

四庫全書

集部

欽定四庫全書

宋元詩會卷四十二

兵部主事陳焯編

姜夔

字堯章居苕溪與白石洞天為鄰潘德久號之曰白石道人與石湖放翁倡酬最多按黃巖亦號白石時人目為雙白其詩學皆得自蕭子巖海藻而姜則蕭之壻也

春日書懷

垂楊大別寺春草郎官湖此鄉有石友合并不得呼瘦

藤倚花樹花片藉冰壺老鄭談絕妙辛楊句數腴平生
子姚子貌古心甚儒時邀野僧語間與琴工俱酒闌興
未了左轉城南隅大江圍楚碧烟水入玄虛流落不自
恨惟嗟故人疎一月三見夢夢中相與娛日日潮風起
悵望武昌魚

夏日寄朴翁時在靈隱

風吹松樹枝懷我松間友雲從北山來令我屢回首山
雲夜夜起山雨侵人衣遙知竹窗裏自吟新雨詩

太湖

茫茫復茫茫中有山蒼蒼大哉夫差國坐占天一方夫
差醉蓮宮巨浪搖不醒越兵從何來奪我三萬頃年年
亭上秋一笛千古愁誰能知往事飛下雙白鷗

范大參入覲頗愛鄙作以詩謝之

問句石湖老如將日指標枯中說滋味高處戒虛驕頗
喜唐音近寧論漢道遙正聲今在耳萬樂聽簫韶

小孫納婦

慶事集朋親孫枝喜氣新歌雲停碧落舞雪眩青春暖
日花君子清樽酒聖人一春行樂地不負牡丹辰

呈方叔

聲牙落魄一閒官職事何嘗見一斑不是論松須說劍
若非尋壑即觀山間看落葉隨風去冷笑奔雲送雨還
更有劉巖楊處士伴渠癡坐老花間

夏日天台

青天揮簷臥藤牀翠袖攜壺過酒漿蝟腹出波烹芡實

裹蹄和露擘蓮房招呼時入雞豚社獨坐曾無雁鷺行
便是赤城真隱吏不須劉阮更相將

冬夜不寐

宵柝迢迢警睡魔靜思甘分老林坡忍饑但有嵇康嬾
扣角曾無甯戚歌不起妄心思世事只將閒意養天和
時人休說長生術學著長生事轉多

負暄

不是羲和德澤流寒鄉何處覓溫柔絕憐天上黃綿襖

大勝人間紫綺裘，旋挾藜牀隨影轉。
更攜書卷與閒謀，天和妙處誰能會。
欲獻君王却自羞。

和陸放翁見寄

遙知三徑長荒苔，解組東歸亦快哉。
津岸紛紛羣吏去，船頭衮衮好山來。
平時佳客應相過，勝日清樽想屢開。
若許詩篇數還往，直須追挽古風回。

送朝天集歸楊誠齋

翰墨場中老斲輪，縱橫一筆掃千軍。
年年花月無閒日，

處處江山怕見君箭在的中非爾力風行水面偶成文
先生只可三千首回施江東日暮雲

京口留別張思順

伯勞飛燕若為忙還憶東齋夜共牀別後無書非棄我
春前會面却他鄉連宵為話經憂患異日相逢各老蒼
更欲少留天不許曉風吹艇入垂楊

吳江舟中

自譜新詞韻最嬌小紅低唱我吹簫曲江過盡松陵路

回首煙波十里橋

琵琶洲

松尾颼颼石浪寒
寒吟蕃曲轉聲酸
人間無此春風手
應是江妃夜夜彈

吳趨夜泊

夜暗歸雲繞柁牙
江涵星影雁團沙
行人悵望蘇臺柳
曾與吳王掃落花

林光朝

字謙之興化莆田人少從陸子正授尹煊之學得
伊洛正傳四方就學者甚衆年五十進士及第為
孝宗隆興元年調袁州司戶叅軍用大臣薦得館
職歷著作佐郎兼禮部官進司業以不往賀張說
出為廣西提刑召拜祭酒乾道間帝幸學命講中
庸大稱善面賜金紫不數日除中書舍人會謝廓
然除侍御史光朝繳還詞頭因請外任出知
婺州引疾予祠卒年六十五有艾軒詩集

送別湖北漕李祕監仁甫

文字渺煙雲過眼徒浩浩所有未見書惜哉吾已老子
雲客長安陳迹如一掃同叔向來人我生苦不早亦聞
青城山斯翁為有道瞿塘不可上秋夢長顛倒白日來

西崑一見自應好縱譚百代前至竟非枯槁多為開口
笑明月生懷抱黃鶴有高樓恍如事幽討攬轡逢道州
聽書下下考周南勿留滯掇拾供史藁分手重酸辛璠
璣衆所寶十日不得面何為太草草

資中行奉寄臨邛守宇文郎

銅駝陌上生秋草前者刻石今如掃檐邊半紙半模糊
下牀三日成悲惱倉史萌芽何可見要從筆意生秦漢
欲將奇字問何人所守一家如小篆是中變幻隨形模

鐘鐻鼎鬲匪盤盂如何西京到魏晉搜盡蒼崖惟此書
即今原隸見顛末仍于畫上分鉛銖燕然有年固可紀
筆勢豈得先黃初中郎袖手欲無作正始不逮況其餘
幸哉一見俱抵掌翩翩如反古石渠且說金陵佛屋何
年燈晉分隋張猶青熒忽聽荒雞還自起資中之刻不
徒爾

鞭春行

輓轡宵寒田雀饑江梅落蛙兔脚肥枯腸一夜轉雙轂

眼光吹上蝦蟇衣巖腹新晴山鬼哭女媧墳外春風歸
繭村紙簾大如席柝柝杖藜金雀飛

次韻奉酬趙校書子直

雁塔新題墨未乾去年燈火向秋闌趣看天祿青藜杖
怕著王孫紫綺冠好在三山尋浩渺何如一紙問平安
觚稜皎月無人到玉糝初成許共餐

送別傅郎中安道持節閩中

忽然鄉思若為收莫到三茆最上頭二月東甌看負弩

一天南蕩想行舟過家上冢從今數落絮飛花合晝遊
料得甘泉來奏計定應前席莫遲留

閏月九日登越王臺次韻經畧敷文所寄詩

閒陪小隊出山椒為有吳歌雜楚謠縱道菊花如昨日
要看湯餅作三朝千重嶺海供橫槩一帶風煙聽采樵
憑仗折衝如此好不應東去更乘輶

前歲過真陽初識子欽今道出曲江不忍遽分偶
成長句志別

秋崖一夕卷炎蒸那更揮斤為斲冰
碧落舊尋燒藥竈
白芒長對讀書燈
相期大庾何多日
似出浮屠向上層
縱有分張吾未老
定從臺閣看飛騰

賀丘國鎮致仕

桃花流水是家鄉
洛下才名四十強
自有赤松堪辟穀
那能白首更為郎
案頭貝葉忘言久
江上蓴羹引興長
解后却成香火社
好將詩句細商量

送陳侍郎應求知泉州

百片牙旗水面長
蔡邕題在刺桐鄉
十年杯酒開雲榭
一樣官銜過洛陽
我亦攜家緣送客
誰能掃地自焚香
野橋衝臘寒梅白
莫要登臨憶侍郎

甲午

仙掌秋容媚銅樓
曉色遲猗蘭成漢
殿苞竹入周詩鼎
卜卿雲合郊禔彩
仗移隆興乾道日
建武永平時詹事
開新府長秋綴舊
儀禮經猶下問易
道本生知世子家
為法文王我所師
誕彌重海潤漬賞
一天慈九月黃金

藥千齡白玉卮遙開三殿喜高頌走天涯

李昂英

進士番禺人未詳何官仕在南宋孝光間
諡忠簡宋史不載其詩見於石倉選中

送鄭雪屋歸里

征衣點落紅君去與春同貧到歸時見吟多醉後工不
應冠尚鶻自許氣如虹急著看山眼飛帆吸快風

武夷觀

閒乘石罈船又到浙江邊回向初心地飯依古洞天成

丹呼鶴舞噴酒起龍眠雨意偏留客茶瓜定宿緣

景泰寺

樹合疑山盡攀緣有路通遠鴉追夕照低雁壓西風瀑
勢雷虛壑松聲浪半空凭欄僧指似漲霧是城中

觀穫

負郭平田潤秋深穫課勤短鎌行缺月多稼剪黃雲舊
臘占三白今年稔十分太平村舍裡墮穗飽雞羣

白雲登閣

白雲峯擁到危巔傑閣翬飛倚半天
谷響頗疑吟木客
潮回坐見變桑田
幾重山隔幾重海
一日身閒一日仙
真樂無如會心處
林花野鳥亦欣然

登峽山疾風甚雨

長風吹裂碧雲堆
捲取銀河瀉下來
雨攪犀潭千尺浪
煙遮龍壑一聲雷
松翁偃蓋岫隈立
猿女穿羅洞裏回
舊事蘭亭好拈出
婆娑溪曲共流杯

西樵巖

巨石卷阿駕半天樵山風景豈虛傳水簾不捲四時雨
丹竈空凝萬古煙印石尚存烏利跡問誰曾識紫姑仙
我來遊徧登雲谷更借山僧半榻眠

送舶使孫叔諧東歸

萼蘆高興趁新秋帆腹吞風湧去舟萬寶集登天子庫
諸蠻遮泣海山樓世間顛倒是非夢達者逍遙得失侯
歸到家林定重九團欒杯酒菊花浮

宴鳴珮亭和趙漕韻

數尺飛泉漏隔城，寒品坳處落琮琤。
縣知勝境無塵到，却訝晴天作雨聲。
一軟不容貪者飲，兩峯宜著醉翁行。
此泉十載因人重，曾識光風霽月清。

蒲澗滴水品觀瀑

與可人遊五四并，快風吹面洗炎蒸。
鹿巡夾道千章木，猿挂垂崖百尺藤。
石室橫琴清振玉，壺瓢酌水冷調冰。
瀑簾雨後籠山澗，不許塵埃俗耳聽。

送鑒師往靈洲寺

少年芹泮頂儒冠猛志縑袍出世難孤島一燈開佛屋
長身七尺占僧單鐘鳴魚叩隨緣過櫂舞鷗飛取次看
亭下聽經人在否石欄搖影碧波寒

贈海珠湛老

也曾叅破動風幡坐得形枯鬢早斑衲子指為真鐵漢
江神幻出小金山葉亭浪急翻船入蔥嶺雲深挈履還
香燼未寒行道處蕭森翠竹護禪關

羅浮洞長寶谷王寧素送藥瓢

久矣深山煉鶴形聞呼洞長又逃名斷崖怪木人稀跡
亂石奔泉澗有聲劒定通神收古匣奕聊供玩戲紋枰
藥瓢解贈寧無意重到孤庵論養生

送舶使周申

堂堂山立舊朝簪久屈清流督獻琛風送連艘出獅國
浪吹殘句到雞林平生不隔同袍面中歲難禁惜別心
歸見耆英定相問祇言閉戶萬山深

陳造

字唐卿高郵人年四十三登第調繁昌尉改平江府教授累官安撫司參議范石湖陸放翁俱極稱其詩有江

湖長翁集

魏帝廟

佛狸歲未卯志欲吞宇縣當年江飲馬腥血浸淮甸無人飯耕牛有井巢歸燕至今閱遺史為汝空飲恨緬想瓜步留殺氣纏吳分云何此山椒遺像儼高殿無乃甘事讐吳俗昧所見或復綿歷久後嗣忘敵怨冥漠彼有識福汝吾敢信君看趙與薛徇國冒禍釁魏侯繼前躅

長呼死白刃胡不尸祝之香火均遠近豈但祈神休抑
使頑懦奮誰令決從違引手適我願

長蘆寺

昔年望長蘆去江逾百步垣宇呀已缺浮圖歌欲仆僧
徒噬臍留日有沈溺懼重來舒望眼佛刹非故處安衆
得亢爽定遷疇夙素似聞瓶錫侶復作醯蚋聚居人禱
蠶麥行客乞泉布營者肆夸侈施者不顧慮百堵煥金
碧奚翅復其故往往豪雋人四壁有未具彼徒創寺意

取鎮湍濤怒向來
梵唄所修為蛟螭據在已不自保誘
俗說依怙波流置不省此理吾未諭

繁昌早發

客行固塵身留滯如捩翼及茲祖禮竟
蓐食理帆席風停浪未蟄天曙月正白
版磯滙湍殺荻港煙樹碧杖策丁家洲
徙倚容少息無酒問山店憶鱸聽村笛
烏啼松竹鴈鵠下沙磧回柁投曲渚又
寄糝潭夕情疎或易合不作淮楚隔纍然
槁項翁輒語慰行役

泊小姑山

楚山屹兩姑我見乃其稚聞名詩卷間識面容舟次玉
刻極端麗簪植暝蒼翠娟月上天角相與詫嫵媚怒風
將我西未慙卜晚憩山足舟可艤山木纜可繫山外正
風波獨此佳食寐斷知有神物主此勝絕地明朝捐行
索可無答神賜白鵝雪為肪綠蟻香馥鼻舟穩風又熟
無乃契神意未暇訪彭郎辭費辨非是

命書

命書唐濫觴委源傳呂後有倡莫為遏波蕩今不救字
育叵數計八字詎所囿甲子動垓億舉一百萬漏荒唐
無稽据誦言指休咎奈何聰達人頗復安此謬懷刺曳
長裾偃蹇文士右夸詡走干謁薦墨不待叩士有待濡
沫百請不一售我昔遊江淮知識間新舊文士不到眼
此輩日交遊辭章輕盃水羨彼行橐富鰓鰓問利祿吾
儒所深陋自笑與世違迂論取排詬

布穀吟

人以布穀為催耕其聲曰脫了潑袴淮農傳其言云郭嫂打婆浙人解云一百八箇

鳥何與人事人人以意測
之是非皆不同為作此

潑袴不容脫鳥語徒慙慙輸租質農器有袴那解新官
中催科吏如虎告時趣耕爾能許即今春種未入田安
得縣胥知愧汝卑栖俛啄良易謀聒聒彊任田家憂啼
時未旦夜不休班班血痕銜口頭人將近似測禽語汝
意真解憂農不或傳悍妻天所怒姑不可撓渠不顧罰
為此鳥聲曩愆警世毋為郭家婦南方諛佛古到今人
持數珠家梵音區區說似一百八譏訶勸相知何心浙

風淮俗隔江水意解禽言乃如此蘇黃妙句誰嗣之兩
地流傳併須紀世間儒墨紛相攻巨細彼此臧穀同爭
如痛飲卧長晝付渠馬耳謝東風

識村翁語

勸耕淨居村翁老而健問其壽云山居淡食乃爾昔
一村叟一野僧皆壽百二守杜郎中史丞相呼之致
敬厚設而歸即逝二人壽未必止此厚味非野人所
饗也其言有契予心作此記之

山僧一生饜山菽溪叟所仰纔魚菽漫入侯家與相家
珍膳不應填汝腹百二歲翁清且羸茵坐鼎食寧其宜
焉知暫飽博長往穀神震怒脾媼悲官家顆粒皆民力
此祿食之須此骨兩翁妄食壽弗延當念無功暴天物
我雖不偶猶餐錢車行肉飽隸後先食功揣已懼不稱
因翁有言呼使前盤几畢識翁所言

望夫山

亭亭碧山椒依約凝黛立何年蕩子婦登此望行役君

行斷音信妾恨無終極堅誠不磨滅化作山上石煙悲
復雲慘髮髯見精魄野花徒自好江月為誰白亦知江
南與江北紅樓無處無傾國妾身為石良不惜君心為
石那可得

山居 三首

山間有好事時肯問何如東送筋頭薤鮮分匙面魚披
襟偕我飽攬髮為君梳一笑塵勞外都無病可祛

忽作斷過訪經旬閒瘦筇慵添和詩債病減灌園功石

鼎裏輕碧庭柯零細紅竹君如見慰竟日嘯窗風
鳥息我亦倦行行取徑微石稜妨錯足藤蔓每鉤衣森
木各天籟連山同夕暉推門吟袖冷滿帶野風歸

香雲寺

山月明空隙庭柯下槁乾沈沈僧夜淨漠漠鴈天寒夢
境愁偏隔詩情老易闌未容辭水厄聊復踞蒲團

圩上

小村山影裏山脚水明沙春事初移柳人家未摘茶生

兒了門戶饌客有中鰕笑我塵埃者奔馳鬢易華

丁酉道中暮春

去家如昨日節物轉頭非風處綠自舞雨餘紅頓稀野
橋平水過村路躡花歸趁得酴醾在箏琶拂舊衣

得姪消息

甚喜年穀熟仍聞佳食眠郡人新過此鄉信得真傳社
酒浮蛆淥湖魚割玉鮮平時計安穩莫靳里胥錢

金地寺

側徑崎嶇去飛蘿次第捫山橫欲無地路轉却逢村竹
栢園荒寺莓苔上繚垣殘僧不知客芋火老雲根

陪盱眙王使君東遊

二首

錦席浮波影牙檣轉霧霏飛花窺碧酒舞蝶傷紅衣野
日歌前淡雲峰望處微遊魚應與樂啼鳥莫催歸

纜解鷗飛處船移柳影中林廬桃李月浦淑蕙蘭風酒
淺能無醉歌長惜有終賦詩聊泚筆寓意未須工

雜詠

三首

淮汴朝宗地孤埤只眼前
譙樓西日淡戍鼓北風傳
破竹非無計澆瓜亦自賢
客愁渾幾許撫劒倚吳天

天外纖雲盡山巔望眼遙
平淮剪綠野白塔界晴霄
客裏風光異吟邊物象驕
功名他日事回首興蕭條

關塞淒涼處青徐指顧邊
如何漢正朔不盡禹山川
將略輕三捷天威重萬全
諸公不愒日老子判留年

次瓜州

雲壺平山塔煙明老漚城
客行判費日舟泊細論程
開

水清無濁潮天雨復晴未須歸有夢午枕愜涼生

高頭山

小駐緣雲脚居然睡眼醒楚田銜樹濶漢水挾山青蹠
蹠初忘倦巉巖已飽經川原方啖蔗不擬嘆漂零

書懷

俛仰人間世纔為一笑資百年羊脾熟萬事虎頭癡文
字聊遮眼功名浪朶頤浮生如此爾况復病餘衰

縣西

一徑斜穿犖确行身閒尤覺馬蹄輕坡頭嘉樹千幢立
煙際長江匹練橫茶鼓適敲靈鷲院夕陽欲壓赭圻城
三春簿領沈迷裏野鳥山花眼最明

七夕

龍旌鳳扇一相迎知費青禽幾寄聲天上經年纔舊約
人間轉盼便深更涼河只向樽前落微月偏來酒面明
後夜玉琴彈別鶴獨應乾鵲夢魂驚

夏夜飲客

矻矻官曹興易窮得閒何惜一樽同
傷愁邊到無惡客
從竹間來皆好風勝日詩狂輸酒聖
轉頭渭北復江東
雕鞍未作扶攜去更放蘭釭子夜紅

寄陳居仁

尚記誅茅柳外隄水光搖霧潤窗扉
桑間曾是僧三宿
海上能忘鶴一歸野店樽罍醅脚釀
北鄰雞鶩稿頭肥
解顏一醉平生事更向行藏計是非

贈仲國美

三閱春光一建瓴依然歸櫂泊危亭烏迎客子各頭白
柳學故人俱眼青曾是縱談僊婢僕又成豪飲臥壘瓶
明朝小話前溪別分付溪風管醉醒

贈趙秀才

平生心事釣漁舟解后青衫映白頭肯為功名戲雕虎
不留顏面對沙鷗露溥青葢高荷曉風約黃陂小麥秋
入眼斜川歸趣好此身何處不菟裘

宿野人家

步尋松篠款谿筇忽到孤山處士家
十頃蒼鱗漾墻角
一鉤寒玉插簷牙
杯行不乏紅絲鱠
飯了仍供白露芽
把臂傾舒吾已怯
又分離緒上歸槎

重九山陽儀真兩使君送酒

酒會文期興尚濃
佳辰一笑坐天窮
兩州各遣六從事
九日俄成一病翁
詩不受催空急雨
帽無緣落任西風
明朝晴徑通行屐
却漫支筇遶菊叢

次韻高賓王見投

二首

病念還家可奈愁
客中日月急梭投
土花暈壁迎梅雨
海燕將雛送麥秋
霑袖正憐珠隕睫
闌門能復玉為舟
搯頭閣膝高舂臥
黃妳青奴共此樓

魚辟清澄鳥愛昏
陶翁歸計酒盈樽
山田雨足鳩呼婦
籬苑春深竹有孫
百首旋編新賦詠
三生猶憶舊精魂
小摩他日紅塵眼
閒送蜚雲過海門

林亦之

字月漁福清人受業於林光朝四方從游者戶
屢恒滿惟樂軒陳藻能紹其傳有綱山集行世

丁亥九月十六夜偕李監倉宿臥龍山中聽雨旋

復月出

相喚此山來狂風吹我衣把酒桂花下山雲片段飛掩
門雨初滴開門月旋上倚樹看月明半山聞雨響人間
有佳景詩句頗發越何曾似今夕聽雨還看月

奉題林稚春菊花枕子歌

故人所說菊花枕似把冰丸月下飲秋水一雙明炯炯
數在青囊第一品狂風江上吹蒹葭往往得之嵇阮家

閉門誦書二十載眼睛損盡生空花建陽小作箸頭書
殘更燈火亂蟲魚石渠文字大如斗場屋歲月又不偶
却來南山青草邊東西盡為菊花田手提長筐向山曲
一下收拾三百斛昨者昏迷才起來解把蠅頭小字讀
乃知妙物通羣仙一切藥裏應棄捐

九日遊龍臥山留一夕明日值雨坐超上人房偶
題

野興更周遭應遲問大刀山房逢雨好人意與秋高多

謝烹鮮乳還令厭濁醪重來須累少款款聽蕭騷

陳文煥秀才所宅近市憑樓一望西山宛然

西山簷外見何必鹿門行近晚江聲合疎簾野意生終朝如此好初月更多情却媿才華鈍三年句不成

奉寄雲安安撫寶文少卿林黃中

泥封款款下青冥却許麾幢換使輶夔子城池開幕府杜陵詩卷作圖經十年去國未歸夢萬里看山憑短亭可信明時好人物亂猿啼處是州廳

滕王閣懷古奉呈撫州別駕兼簡戶曹

城邊帝子閣西頭水遶南昌故郡流浦曲天長鷗侶小
夜深雲淨月華浮澹臺墓暗竹根古孺子亭荒荷葉秋
漠漠滄江無了日哦詩休接古人愁

題嚴子陵釣臺

莫向金門傲冕旒歸來却要著羊裘乾坤不是劉文叔
那得長竿到白頭

重陽次日登城山

城山飲罷冷侵衣湖上重來月滿卮未愛疎籬黃菊日
最憐秋水白雲時

呂定

字仲安以武職顯孝宗朝蓋丞相正惠公端之裔
因宦籍而家新昌者也爵至殿前都指揮龍虎上
將軍能詩有說劍集其詩腴秀風流居然大
雅明松溪宰呂繼梗其遠孫也序而傳之

懷古

我昔遊海上東望三神山風波幾萬里蒼茫雲靄間魚
龍自掀舞天空日月閒神僊渺無跡徐福去不還空餘

蓬萊閣千載留人寰

追和蘇子瞻遊峽山寺韻

山迴寶華閣水遶金鎖灣
塵慮頓焉息于茲開我顏
疎鐘日夕動老僧林下還
天風吹白雲悠悠滿松關
歸猿有餘悲月明嘯空山
僊人自何來翱翔八極間
手把玉芙蓉吟笑鏘珮環
歌罷忽飛去千峯堆翠鬟

赴京

太白樓前雨乍收
畫船撾鼓上皇州
肯因離別牽愁思

要把勛名事壯遊千里關河旗帶月一天星斗劍橫秋
胸中賸有安邊策此去應當獻冕旒

奉天門朝賀

曉日初臨萬歲山寶幢華蓋列朝班九重天上來僊樂
五色雲中識聖顏深殿捲簾香霧裊近臣傳制珮聲還
嵩呼齊視恩如海散作陽和滿世間

班師

紫塞回鑾雪正晴王師百萬擁連營馬嘶大地山河壯

旗捲長空日月明
龍虎臺高千嶂聳
鳳凰城近五雲生
聖顏有喜天心順
中外歡聞奏凱聲

登東岳

海內名山孰與齊
清風掖我上丹梯
鵬程九萬扶搖近
世界三千指顧低
瀑挂天門驚霹靂
雨蒸日觀出虹霓
太平會見東封盛
玉簡金書煥紫泥

雪夜

漠漠同雲徧海涯
曉風寒逼綠窗紗
飛揚鱗甲三千界

粧點樓臺百萬家何處妙歌金帳酒誰人清對玉梅花
便應石鼎融冰水烏帽籠頭自煮茶

望岱

岱宗東望鬱嵯峨萬丈僊橋鳥外過秦樹千年空老大
漢碑終古不消磨天壇夜靜垂星斗石磴春深長薜蘿
記得舊遊曾載酒顚然峯頂放長歌

登彭城樓

項王臺上白雲秋
亞父墳前草樹稠
山色不隨人事改

水聲長近戍城流空餘夜月龍神廟無復春風燕子樓
楚漢興亡俱土壤不須懷古重夷猶

戲馬臺

據鞍揮指八千兵昔日中原幾戰爭
逐鹿已無秦社稷
逝騅方歎楚歌聲
英雄事往人何在
寂寞臺空草自生
回首雲山青
矗矗黃流依舊遶彭城

金陵旅夜

一雨皇都萬象明
東風嬌轉上林鶯
火煙亭館春多少

鐘鼓樓臺夜幾更枕上故園蝴蝶夢枝頭斜月杜鵑聲
銀箋欲寫長相憶滾滾江流不盡情

遊匡廬

欲向匡廬觀瀑布便從彭蠡驟樓船一聲長嘯來丹壑
千丈飛流下碧天洞裏樓臺無歲月雲中雞犬有神仙
憑誰呼起巢松者醉擁宮袍對酒眠

度大庾嶺

鑿破鴻濛一竅通至今傳說九齡功天垂瘴雨蠻煙外

路入炎荒火樹中萬里關河瞻北極兩行旌旆過南雄
鷓鴣聲裏端陽近榕樹青青荔子紅

浴日亭和蘇學士韻

危亭突兀倚青山坐對扶桑碧海灣紫霧欲生龍伯廟
洪濤先湧虎門關光搖宇宙花生眼影動欄干酒上顏
遙望蓬萊宮闕曉一輪飛挂碧雲間

王炎

字晦叔婺源人受學張南軒登乾道進士官
著作佐郎出守湖州年八十餘卒有雙溪集

題徐商叟所藏李伯時四天王圖

龍眠有巧手幻出汗血駒老衲或戒之回向心地初遂
畫白衣仙蘄與梵釋俱北方四天王亦附瞿曇居雜以
馬龍像宿習終未除四王名字異且復形狀殊信者謂
其有疑者意其無蕩蕩天門高誰能凌空虛何以信不
疑取諸貝葉書

過浯溪讀中興碑

日光玉潔元子辭銀鈎鐵畫顏公書百金不憚買墨本

摩挲石刻今見之猗那清廟久不作其末變為王黍離
春秋一經事多貶魯頌四篇文無譏漁陽鼙鼓入潼華
公卿徒步從六飛朔方天子扶九廟京師父老迎千麾
紫袍再拜謁道左上皇萬里旋鑾輿牝味鳴晨有悍婦
孽狐嗥夜有老奴扶桑杲杲未翳蝕但歌大業吾何疵
首章義正語未婉前輩不辨來者疑正須細讀史克頌
未用苦說涪翁詩許張勁節震金石李郭壯武如虎貔
斷崖蒼石有時泐諸公萬古聲烈垂天憐倦客有所恨

雨溼江寒催解維神州北望三歎息翰墨是非何議為

胡道士草庵

清風颼颼竹萬箇白日寂寂茅三間春深只有鳥呼夢
地僻畧無人叩關豈但壺中堪避世也勝圖上可遊山
出門回首不能住輸與道人閒復閒

解官到郡諸丈置酒岳陽樓招炎為客鄧巴陵索

詩

重上危樓覽洞庭故人一笑對飛觥君山只似觚山綠

江水不如湘水清
半日勝遊成樂事
三年俗宦損詩情
天涯解后還離別
莫惜尊前底裏傾

和陸簿九日

風露蕭蕭木半黃
老來淡薄似秋陽
一樽冷落思佳客
九日淒涼在異鄉
採菊何心追靖節
哦詩無語答仇香
危臺戲馬今安在
休惹清愁攪石腸

出郊雜詠

閉戶不知春色佳
柳梢欲暗可藏鴉
鴨頭新綠齊腰水

女頰輕紅刺眼花

晚憩田家

家書未到鵲先喜
春事無多鶯又啼
偶對好山留客坐
綠陰遮屋日將西

雙溪種花

二首

雙溪漸有雜花開
每日扶筇到一回
勝似名園空鎖閉
主人至老不歸來

蒼頭為我斲西山
扶病移花強自寬
縱不為花長作主

何妨留與後人看

周文璞

孝宗時人與姜夔友善姜有夏日
寄朴翁靈隱詩或云即文璞也

銅雀硯

君王有遺令婢子守空臺遙望西陵下
漆燈照鵲杯玉顏闕釵澤松栢生悲哀
低吟短歌行想像奸雄才清泉沈金彩
古煙凝紫灰零落故瓦在雕鐫若陶坏
為人作書硯詞章出詠諧上下千載間
流轉何悠哉那知壚中

人天命不復來齊昏亦披猖增土築崔嵬年年漳河頭
野棠如雪開

金牛洞

凌兢下危梯俯偃坐溪穴回身避雲霧偃面視日月藥
苗護鎔斨竹節截薜蘿安知幽谿下有此大奇絕金牛
鏹光景仙牒尚可閱岡頭春已半枸杞如點血便恐顛
風興橫吹石崖裂

堯章金銅佛塔歌

白石招我入書齋使我速禮金塗塔我疑此塔非世有
白石云是錢王禁中物上作如來捨身相饑鷹餓虎紛
相向拈起靈山受記偈龍天帝釋紛惆悵形模遠自流
沙至鑄出今回更精緻錢王納土歸京師流落多在西
湖寺錢王本是英雄人白蓮花現國主身蛇鄉虎落狗脚朕
何如紅袍玉帶稱功臣天封拆開即退聽兩浙不聞笳
鼓競歸來佛子作護持太師尚父尚書令一枚傳到白
石生生今但有能詩聲同袍秦外鉅師兄哦詩禮塔作

佛事同喫地鑪山芋羹何曾薰陸綺牀供但見相輪銅
綠明哦詩禮塔猶未畢蘆葉低飛山雨溼

戴敏

字敏才號東皋子天台人生乾道間攻詩自適不
事制舉終窮無悔其子復古後亦繼父志以詩名
家

西溪陳居士家

來訪西巖老家居水竹村紫鱗遊鏡曲黃犢卧雲根自
昔好賓客相傳到子孫不行亭下路護筍別開門

鄭公家

門墻多古意耕釣作生涯
菽米散魚子蓮根拔虎牙
弄孫時擲果留客旋煎茶
頗動詩人興滿園蕎麥花

小園

小園無事日徘徊頻報家人送酒來
惜樹不磨修月斧愛花須築避風臺
引些渠水添池滿移箇柴門倚竹開
多謝有情雙白鷺暫時飛去又飛回

約黃董二親與桂堂諸姪避暑

世間無處避炎蒸，欲叫西風叫不應。
恨乏由檀除熱惱，心思赤脚踏層冰。
醉遊河朔誰同往，表借明光愧不能。
聞有山林最深處，清涼境界著高僧。

遊張園


乳鴨池塘水淺深，梅天氣半晴陰。
東園載酒西園醉，摘盡枇杷一樹金。

林夢英

字叔虎，原籍閩清，徙撫州，為臨川人。
登淳熙二年進士，知武岡軍，遷祕書丞。

筆架山

謂天高高由積氣謂山高高由積翠山中雲霧皆寶衣
天上星辰有奇字相傳筆架幾千年此是仙樓三十二
落霞孤鶩近西江青帶瑤簪如八桂



宋元詩會卷四十二

欽定四庫全書

集部

宋元詩會卷四十三

四

詳校官中書_臣陸 湘

主事銜_臣徐以坤覆勘

總校官知縣_臣繆 琪

校對官中書_臣牛稔文

謄錄監生_臣黃 鑫

欽定四庫全書

宋元詩會卷四十三

兵部主事陳焯編

羅願

字端良歙州人父任吏部願以世科起家孝宗時
官鄂州太守宋史于劉清之傳附載其名明宋濂
序其鄂州集推古文為南宋
第一人云朱文公甚服膺焉

梁寺丞見示過嶺新作

凌晨登鬱孤南走韶陽道封疆有申畫山川本懷抱公

行度寒嶺殘雪故未掃高情無南北反謂茲山小頃來
我嘗遊亦覺山媚好前賢困遠謫我輩得幽討兩崖瞻
欲眩數樹攀且繞想公哦新詩千騎轉林杪參佐候顏
色約束軍聲悄韶陽古名郡四十專城早重華已千歲
蒼石在雲表魚龍舞幽壑遺韻益可攷以茲供撫玩或
可薦壽考公餘亦時飲未用絕芳醪行行布恩惠正直
神所保

和汪伯虞求酒

君不見菊潭之水飲可僊酒旗五星空在天此江穀紋
奇更絕投以麴米清如泉分甘正擬供低唱要築糟臺
須大匠詩人便欲醉十日歡伯僅堪陪一餉曰予此樂
未知之獨愛為瓶居井眉因君飲興亦浩蕩夢隨驂駕
觴瑤池昔賢酒盡孤長吸大似竹枯還欲瀝明朝秀句
傳滿城笑指空樽臥牆壁

望梅亭

南安軍未至庾嶺有亭名望梅兄端翔權軍事時所作

節物重陽後風煙庾嶺頭休論梅子雨纔度菊花秋翠

壁堪橫絕幽亭勸小留謀生兄弟拙一一徬南州

次韻酬通判劉兄岳陽樓見懷一首

魚龍掀舞後渺莽記空庭地帶三苗濶山傳二女靈客
懷光水月詩筆妙丹青少作揚雄悔唯思草一經

送邕州吳使君

題輿纔赴日邊程便擁油幢鎮列城地望素高唐五管
人才今似漢三明時清市駿非無意歲晏逢花好寄聲
太學英名湖海氣此行持論要平平

奉東李叔勤覓茉莉花栽

鄆令風流太史家早知茉莉有奇葩
生嫌衆色空塵滓遍閱餘香見等差
多謝珠璣來坐右好將根蒂到天涯
蜀江紅紫紛披後初看東南第一花

薛季宣

字士龍永嘉人起居舍人徽言之子也幼孤從伯
父弼宦遊及見渡江諸老聞靖康後南遷大略喜
從老校退卒語得韓岳兵間事甚悉年十七起從
荆南帥辟書寫機宜文字獲事袁溉受伊川之學
其于封建井田鄉遂司馬法之制無不研究焉用
樞密使王炎薦於朝召為大理寺主簿時江湖大

旱淮北民多歉塞者宰相白遣季宣往收之以實
邊季宣為表廢田相原隰復合肥三十六圩立二
十二莊于黃州凡置戶六百八十有五事竣入對
語及時弊甚切孝宗稱善恨得季宣之晚而宰相
虞允文忌之出知湖州改知常州
未上卒年四十有浪語集行世

跋東坡詩案

南方有佳木遠在漲海涯沈水產其節難古生其肌結
根松栢場龍腦實離離蜚獠豈知貴斧斤斬樂枝椽為
糠粃槽將食犬與豨條枚惡鬢曲芟除棄江湄滄流蕩
回波不與朽壤期年代知幾閱愈久乃見奇根株到餘

瀝復恐分寸遺終焉盛芬烈蘭蓀謝芳姿

二女篇

天聖中韓魏公居所生憂從其兄琚守齊安即安國
寺西廡為書堂以居恒有二女子夜至衣冠高古容
裝麗甚公恬不以為怪及去二女告曰妾非人也亦
非僊人鬼魅遊處再歲而言不及亂公德士也行矣
即推此澤天下予讀齊安記屈原之死二女孝慈亦
于此投江故武昌郡人以五月五日競渡投角黍迎

神舟上二女非僊人鬼魅豈靈均二子之精爽耶不然何知人如此之審而後先居者莫之能見為作二

女篇

姃娉二美人幽閑真種性色秀雪宵梅衣冠儷修正巖巖韓稚圭寂寞自清靜虛室掃齋居展禽當季孟神遊問寒暄不得窺信行怪力視茫茫久要交善敬語之非異類安民公有命蓋聞楚靈均汨羅存死證二女終孝慈雙玉澄江映當初黃鄂人盪漿追游泳端午化成俗龍

舸長犇競事神微有道角黍勞將迎非鬼且非僊世士
憑誰偵

貴遊行

沙堤大蓋何宮窿底人佩玉鞍蒙絨儼如熊虎馬游龍
誰何出入咸陽宮笑刀瓠體顏芙蓉步趨持重為雍容
諸侯爰統掌百工調元為職裨九重萬錢一食聲鼓鐘
猶言下筯終無從異時糠噉腸不充家徒壁立其室蓬
抄撮語麗文彫蟲繪為繡句欺南宮原無萬卷澆胸中

脂韋嬖嬰陳小忠竭民膏髓自為功榻前觸事惟迎逢
冒思責難始為恭君王謂賢拜三公門如沸湯賄賂通
財侔縣官邑侯封積金猶欲齊潛室家有錢爐非範銅
賣官鬻獄揚成風後房的礫燕支紅皆民女婦來無蹤
有憂失得常忡忡殺賢賊能摧英雄汲將同類塞要衝
害苗之心饒蝗蝻忽彎射羿逢蒙弓怡然自得豁心胸
黯如抹漆何赤衷向人自欺咤匪躬高自標置人盲聾
言立便擬稱儒宗學禪逃俗坐談空世間將謂無軻雄

言出波流士與農却矜巧宦官既崇笑伊魯儒嗟道窮
那知達人節青松視而土苴及蛆蟲古今異時理道同
姦邪未必皆令終君不見晉朝失國隳金墉為奴為胥
豈惟懷愍墮紫濛

遊竹陵善權洞

萬古英臺面雲泉響珮環練衣歸洞府

洞水倒流入洞

香雨落

人間蝶舞凝山魄花開想玉顏幾如禪觀適遊鮑戲澄

灣

寺故祝英臺宅洞有白龍今人見鰻魚四足嘗出水面

都場正月思雪中石門之遊

謝客窮幽處，僊宮隱薜蘿。二峰竅魏闕，雙瀑瀉天河。狎
猶應難致猿猴，却患多雪中。山更好淹歲，定如何。

狎讀如廣

類猿而綠，讀黃字去聲。類狗而黃，惟石門山中有之。

松花唐玉蘂花，介甫謂之瑒花。魯直謂之山礬。武

昌山中多有之，其葉可供染事。土人用之釀酒。

松綠吐瑤琨，冷然郭外村。僊人來玉蘂，文士立山礬。芳
澤留絲素，風流付酒樽。莫言瑒酷似香處，不勝繁。

讀三國志

左角蠻攻觸南柯檀伐槐俳諧記名字人物委塵埃錦
里昔曾到樊川今此來遺風不可見觀古意悠哉

周將軍廟觀岳侯石像

侯祠初毀道士不忍壞侯
像沈荆溪中因得不損

萬死何知獄吏尊成名蓋代古難存

侯初下大理獄吏
執筆請辭大書其

紙尾而唾之曰汝觀今世烏有大臣
繫獄而生者趣具成案吾為汝書

二桃豈是功高賜

一舸不容身退論幾為飲江思道濟繆因圖像削王敦

沈碑千古蛟川恨留與無窮斷客魂

趙師秀

字紫芝温州永嘉人宋乾淳中所稱永嘉四靈之一也四靈謂翁靈舒徐靈暉靈淵趙靈秀靈非徐趙本稱因與翁靈舒居同里詩同調故世皆以靈目之也四靈中惟師秀嘗登科入仕仕亦不顯業水心評其詩字格布詞不失唐風而變化秀逸過之觀四靈詩如出一手紫芝尤為之冠云

桐栢觀

山深地忽平縹緲見殊庭
瀑近春風溼松多曉日青
石壇遺鶴羽粉壁剝龍形
道士王靈寶輕強滿百齡

舟行寄翁十

輕舟風色好波面去迢迢取爾詩重讀令吾病欲銷江
禽停晚樹澗水入秋潮已覺懷人極分攜始一朝

縉雲縣宿

親知因別久具酒勞經過古邑居人少春寒入夜多雨
香僊地藥燭動石橋波稍覺離家遠鄉音一半訛

筠州郡庠山亭

一來高處望遠近盡秋容秀氣歸才子清風屬釣翁溪
晴分別港山闕見他峯獨憶良宵月無因宿此中

延禧觀

寂寞古僊宮
松林常有風
鶴毛無葉下
井氣與雲同
背日苔磚紫
多年粉壁紅
相傳陶縣令
曾在此山中

石門僧

石門幽絕甚
獨有一禪僧
寺廢餘鐘在
房高過客登
山蜂成苦蜜
崖溜結空冰
如此冬寒月
他人住豈能

秋色

幽人愛秋色
祇為屬吟情
一片葉初落
數聯詩已清
瘦

便藤杖細涼覺葛衣輕門外蕭蕭徑今年菊自生

簡同行翁靈舒

久晴灘磧衆舟楫後先行終日不相見與君如各程水禽多雪色野笛忽秋聲必有新成句溪流合讓清

靈山閣見二徐舊題

一面見溪水三邊皆翠微晚來虛檻外秋近白雲飛重至恰身老同吟感客非靈山自如畫依舊隔斜暉

秋屏作

凡有闌干處秋來徧往還就中惟此地全得見西山雁
落遙沙小人登廢壘閒因憐一州景皆在夕陽間

送沈莊可

清事貧人占斯言恐是虛與花方作譜為米又持書時
節寒相近山林拙未除西江波浪急送子一愁予

巖居僧

開扉在石層盡日少人登一鳥過寒水數花搖翠藤茗
煎冰下水香炷佛前燈吾亦逃名者何因似此僧

壕土

遠近人家住過橋路盡通野田行瘦馬淺渚聚羣鴻地
靜微泉響天寒落日紅若非身作更不道是城中

月夜懷徐照

月色一庭深迢遙千里心湘江連底見秋客與誰吟寒
入吹城角光凝宿竹禽亦知同不寢難得夢相尋

送倪道士之廬山

近方辭地肺本自住天台有鶴相同出無雲作伴回道

房隨處借詩板逐時開又說廬山去閒看瀑布來

德安道中

餐餘行數步稍覺一身和蠶月人家閉春山瀑布多鶯啼聲出樹花落片隨波前路東林近慚因捧檄過

贈約老

一徑入深竹數楹臨古溝更無人共住極喜客來遊白髮長垂領新茶綠滿甌自言門外寺皆是老僧修

翠巖寺

石巖看不見翠色自重重
春雨生松葉山風響鐵鐘
碑頑工費墨草嫩鹿添茸
住院吳僧老相迎憶舊逢

薛氏瓜廬

不作封侯念悠然遠世紛
惟應種瓜事猶被讀書分野
水多于地春山半是雲
吾生嫌已老學圃未如君

送徐道暉遊湘水

春盡雨霏霏春寒猶在衣
人尋香草去雁背遠峰歸
瀟水添湘濶唐碑入宋稀
應知名與姓題寫遍岳扉

劉隱君山居

嫌在城中住全家入翠微
開松通月過接竹引泉歸
慮淡頭無白詩清貌不肥
必無車馬至猶掩向巖扉

官舍初成

為宅傍城牆先求夏日涼
鑿池容衆水栽竹斷斜陽
官是三年滿身無一事忙
不知何補報安坐恐難當

會景軒

此中非一景欲狀固難名
江近秋陰早山多曉氣清
斷

雲分樹泊饑鶴下田行別擬深更至虛空看月明

大慈道

青苔生滿路人迹至應稀小寺鳴鐘晚深林透日微
野花春後發山鳥澗中飛或有相逢者多因採藥歸

扶欄

強起扶欄立新寒陡見侵鐘聲諸寺曉柳蔭半池陰
病久方憑艾貧深或夢金湖邊好風日孤負幾登臨

葛翁小閣

樹色對疎櫺橫陳一片清微風楊葉下斜日竹梢明此
老無塵事雙妹亦道情客來憐素壁題句不題名

訪韓中止不遇題澗上

隔澗竹扉深蒼童引客尋雖然垂晤語猶得見園林野
蔓時妨步山蟬亦好吟石根泉數斗清冷應人心

貴溪夜泊寄趙昌甫

著草占秋動逢秋早得歸本非為事迫不欲與心違波
淨孤螢度宵涼數葉飛遠懷高卧者微月閉松扉

沈洞主

案上陰符卷應逢驪母傳無言過永日不食度終年雲
覆燒丹竈花浮洗藥泉時聞有玄虎來禮洞門前

和鮑縣尉

留僧秋閣上身自伴僧閒漱齒臨寒水焚香對遠山野
禽偷果去童子借經還餘興成詩句高題屋柱間

送爽上人抄化

冒寒獨向何方去為建靈山閣未能詩卷帶呈看疏客

藥爐畱借共房僧夕陽岸上行枯葉瀑布巖前聽折冰
事到有緣隨處應回來金碧入雲層

暮春書懷寄翁十

帝里逢春雨不乾纔晴數日又春還桐花半落官河水
榆葉全遮客舍山未悔濶疎令事去最憐乏絕礙身閒
菖蒲九節今堪采思爾逍遙澗谷間

移居謝友人

賃得民居亦自清病身於此寄飄零筍從壞砌磚中出

山在鄰家樹上青有井極甘便試茗無花可挿任空瓶
巷南巷北相知少感爾詩人遠扣扃

簡孫正字

空齋兀兀難消日况入中年睡亦疎洗釜煮蔬留客飯
卷簾移菊看人鉏秋衣因病全更衲曉髮迎寒半脫梳
多謝貴交芸閣裏許令隨意借官書

贈鄧漢卿

單獨一身長不定亦無書卷得相隨忙過人世當閒日

老遇朝廷用少時衝雪自行路苦看松長恨買山遲
蕭蕭白髮寒燈下寫就詩篇欲寄誰

孤山寒食

二月芳菲在水邊旅人消困亦隨緣晴舒蝶翅初勻粉
雨壓楊花未放綿有句自題閒處壁無錢難買貴時船
最憐隱者高眠地日日春風是莞絃

寄茅山溫尊師

幾度題詩寄入山不知何處得書看莓苔石上秋吟苦

星斗壇中夜拜寒鶴改新名呼未至碑逢斷刻打應難
憶師每欲尋師去芝朮栽成自可餐

會宿再送子野

又承出郭到貧家一度分攜鬢易華自說印書春可寄
獨慚缺酒夜難賒眠遲古鼎銷殘火吟苦寒缸落細花
羸病不能親送別夢魂先立渡頭沙

病起

身如瘦鶴已伶俜一卧兼旬更有零朝客偶知親送藥

野僧相保密持經力微尚覺衣裳重才退難徼筆硯靈
惟有愛花心未已遍分黃菊挿空瓶

翁卷

字靈舒永嘉四靈中卷齒居長故趙徐以二靈舒
而并稱靈亦好事者品目之也詩為華碧軒集

送陳郎中知嚴州

頻年經虎害人望使君來地重分旄節州清管釣臺涼
天星象動吉日印符開帝擢平津策曾知有用才

寄趙靈秀

千山落葉深高樹不藏禽遊子在何處故人勞此心閒
燈妨遠夢寒雨亂愁吟僧爽曾相約花時共一尋

送人赴沅州任

舊貢包茅地中存古意長去程逢嶽雪上事帶春陽露
結硃砂氣波流白芷香大夫祠寂寞煩與奠椒漿

悼雪菴禪師

悟了無生妙歸空若故鄉竹房三尺像石榻一爐香壞
衲猶懸樹新松忽過墻僧中留不得幾日為淒涼

寄沈洞主

想當清夜醺帶月扣僊鐘指上雷霆訣
菴前虎豹蹤藥收陽地草薪採故枝
松擬即尋師去茅峰疊幾重

太平山讀書奉寄城中諸友

寥寥鐘磬音永日在空林多見僧家事
溪便靜者心虛庭雲片泊側徑石根侵
此去城闌遠君應懶出尋

冬日過道上人舊房

已知起衆相假質任成灰房是他僧住
門無舊客來冰

乾半池水花落一根梅猶自疑行脚何年見却回

春日和刘明遠

不奈滴簷聲風回昨夜晴一堦春草碧幾片落花輕知
分貧堪樂無營夢亦清看君話幽隱如我願逃名

送薛子舒赴華亭船官

君到雲間日應分二陸名縣圖山色少井味海潮并刻
局三年印春風半月程野人因買鶴曾向此中行

曉對

獨對曉來晴天寒景物清梅花分地落井氣隔簾生曾
是吟招隱何時遂耦耕蕭疎頭上髮已白二三莖

暮春病歸

朝朝風景添吾病亦開簾洗藥花前曬傳方壁上黏力
微還省語身老更看髯昨日林僧至茶杯始一拈

寄永州徐三掾曹

聞道居官處千峰近九疑合流皆楚水高石半唐碑香
草寒猶綠清猿夜更悲其中多隱者君去得逢誰

書隱者所居

百事已無機
空林不掩扉
蜂沾朝露出
鶴帶晚雲歸
石老苔為貌
松寒薜作衣
山翁與漁父
相過轉依依

能仁寺

芙蓉峰入天
寺與此峯連
得見是冬月
要來從昔年
寒潭盛塔影
古木帶廚煙
偶值高僧出
禪牀坐默然

石門菴

山到極深處
石門為地名
嵐蒸空寺壞
雪壓小菴清
果

落羣猿拾林昏獨虎行一僧何所得高坐若無情

寶冠寺

山多猿鳥羣永日絕囂氛一澗水流出幾房僧共聳拄
筇黏落葉拂石動寒雲誰昔來營此尋碑看記文

秋日閒居呈趙端行

閒居觀物化幾葉又飛東清氣全歸月寒聲半是風病
多憐骨瘦吟苦笑身窮折得鄰家菊還思靖節翁

初晴道中

初晴殘溼在衆樹碧光鮮幽鷺窺泉立閒童跨犢眠依
山知有寺過水恨無船石路是誰作姓名巖上鐫

題武義趙提幹林亭

武陵諸勝狀如列在簷前一郭樓臺日數村桑柘煙鳥
啼春滿谷秧綠水平田中有漁樵影吾詩詠不全

贈孫季蕃

立談飛絮中相遇在吳宮以我為生拙憐君失計同醉
酣花落月吟苦竹搖風自作廬山記幽竒欲遍窮

孫按

惟信字季蕃開封人自號
花翁工詩詞有官業去

贈劉高士

靈境康廬上師曾此處家今遊在京國誰為管煙霞
覓句行逢鶴持經坐對花笑予非酒戶相勸滿甌茶

送人遊天台

暫遊行李少幾日到天台船帶落潮發月從前浦來
花源香不斷藥地綠成堆莫學他劉阮經年忘却回

宿寺

一宿此禪宮身同落髮翁深窗難得月老屋易生風燈
冷紗光淡香殘印篆空獨憐吟思苦妨却夢西東

鮑使君閒居

吟樓影在湖波上吟景長從望處生疊石擬成幽嶂色
種松移得遠灘聲多諳藥品曾因病却著荷衣欲避名
聞說近來心更靜案頭惟有一琴橫

山中

山中凡事幸相宜第一紅塵免上衣尋藥每同丹客去

拾薪多趁牧兒歸，鳴泉漱石寒蒲潔。
宿霧蒸泥早蕨肥，不奈隣峰學禪伴。
時時來此叩巖扉。

次韻葛天民

接得詩來勝接書，憶君情思豁然舒。
却看城裏誰家竹，又鎖湖邊舊住廬。
曾有退之憐賈島，豈無得意薦相如。
欲知別後予蹤跡，只向此間問釣魚。

贈陳管轄

一拂清風一袖雲，紫陽容貌鶴精神。
詩因道進言辭別。

丹得師傳火候真廬嶽峰前吟瀑布混儀圖上禮星辰
我來暫作閒人歇多謝僊翁相訪頻

次徐靈淵韻贈趙靈秀

一軸黃庭看不厭詩囊茶器每隨身三年在任同僊隱
一日還家只舊貧種得溪蒲生似髮教成野鶴舞如人
出門便是登山路更要遙山翠色勻

徐照

字道暉永嘉人自號山民四靈之詩皆尚五言近
體而道暉幽眇峭刻思致尤奇辛嘉定四年詩號

芳蘭

軒集

蝗飛高

戰士屍上蟲蟲老生羽翼目怒體甲硬豈非怨氣激櫛
櫛北方來橫遮遍天黑戍婦聞我言色變氣咽逆良人
進戰死屍骸委砂礫昨夜夢魂歸白騎曉無迹因知天
中蝗乃是屍上物仰面久迎視低頭淚雙滴呼兒勿殺
害解繫從所適蝗乎若有知飛入妾心臆

青鳩詞

勞勞復勞勞生人半行客今人行古道古道有行役相逢莫等閒相離易疎隔殷勤紅杏花徹宵對芳席明年花開人東西青鳩食花舊處啼

宿翁靈舒幽居期趙紫芝不至

江城過一宿秋氣入宵濃蛩響移砧石螢光出瓦松月遲將近曉角盡即聞鐘人起行庭際思君恨幾重

贈江心寺欽上人

客至啟幽戶筍鞋行曲廊潮侵坐禪石雨潤讀經香古

硯傳人遠新篁過塔長城中如火熱此地獨清涼

送塵老入廣化米開田

行李衝冰雪塗程半是船去從人乞米歸要海成田遇
景因開畫思茶亦掬泉好風名舶趕相候立江邊

宿寺

古殿青燈冷虛廊葉掃風掩關人迹外得句佛香中鶴
睡應無夢僧談必悟空坐驚窗欲曉片月在林東

題江心寺

兩寺今為一僧多外國人流來天際水截斷世間塵鴉
宿腥林徑龍歸損塔輪却疑成片石坐對謝公身

題羅隱故居

片水靜無塵青山是四鄰上天如有意此地著詩人吟
得物俱盡罰令生世貧因來尋古跡只見石為麟

懷如順上人

西湖湖上寺一別二三年舊住房長閉新栽樹已圓空
多相憶夢不得寄來篇喜見鄰僧說歸期是臘前

訪觀公不遇

卧犬聞人出門當青櫟林固知多不在自願欲相尋宵
短餘香印鄰疎出磬音昨來曾寄茗應念苦吟心

石門瀑布

一派從天下曾經李白看千年流不盡六月地長寒灑
水跳微沫衝崖作怒湍人言深碧處常有老龍蟠

題衢州石壁寺

岸石橫生脹平林一里溪衆船寒渡集高寺遠山齊殘

磬吹風斷眠禽壓竹低自嫌昏黑至難認壁間題

題浯溪

知是漫郎宅舟中聞寺鐘小溪通正港高石壓羣峰綠
樹成春蔭荒臺見古蹤唐碑三十本獨免野苔封

白石巖

一石入遙天千峰疊在前人行不到處僊去未多年竇
暗雲生像簷斜日照泉皇朝宣賜物弟子尚能傳

壽昌道中

碣字芙蓉驛喜行行不難路侵滄海過人得異山看圓
石蠟黏滿平途鷺立寒一遊期一月回日必冬殘

題翁卷山居

空山無一人君此寄閒身水上花來遠風中葉動頻蟲
行黏壁字茶煮落巢新若有高人至何妨不裹巾

訪僧居

客至無他事房門不厭敲好山元帶郭損屋旋鋪茅靜
砌生靈藥高林出遠郊水禽多不見春暖漸營巢

永州寄翁靈舒

古郡百蠻邊蒼梧九點煙去家疑萬里歸計在明年風
順眠聽角樓高望見船筠州當半道長得秀詩篇

題李商叟半村壁

一徑蒼苔合連年不出門風高松有韻溪滿石無痕不
自知名重令人覺道尊更憂徵詔至移室向深村

送塵老歸舊房

數間茅屋殘山外片石峻嶒樹影交給假兩旬秋易盡

相尋一舍路非遙
盆栽怪木緣能畫
池畜珍魚不入庖
聞道水松三百步
夢隨流水到溪橋

會飲鮑使君池亭

案上一琴書數卷
不須此處有笙歌
厭居城市觀天小
喜到君家見月多
葉滿地飛隨步履
鶴於人熟聽吟哦
明朝也向山中去
手把松枝養太和

同劉孝若野步

杖履相從步野田
坐臨堦所和詩篇
要看隔水人家菊

試借繫門漁父船且緩歸舟知有月不生酒興為無錢
寒來莫問家中事纔得身閒即是僊

高山寺晚望

石路近門方失險刺桐疎處見僧歸小坡重疊無平屋
四月陰寒尚袂衣山到道州高莫比水分湘口綠相圍
暮雲不隔東南望一片遙無白鳥飛

徐璣

字文淵從晉江遷永嘉官建安主簿龍溪丞武當
長泰令嘉定七年卒年五十九按璣與照同姓同

里同調同時實非兄弟曹能始云二徐俱隱居不仕耽情丘壑以故發之咏歌清真澹遠出於自然亦未嘗言璣為照之弟但璣已歷官丞宰謂之不仕則失考云詩名二薇亭集

投楊誠齋

名高身又貴自住小村深清得門如水貧惟帶一金養生非藥餌常語是規箴四海為儒者相逢問信音

江亭臨眺

問得梅花信寒林動晚聲雨來山漸遠潮去水還清寥落尋新句歡娛解宿醒相攜歸路滑燈火近孤城

題陳待制湖莊

圍無三畝地四面水連天行向樓高處却如身在船野
花春渚外山色海雲邊一任人來往茲懷亦浩然

宿寺

古木山邊寺深松逕底風獨吟侵夜半枯坐雜禪中殿
淨燈光小經殘磬韻空不知清遠夢啼鳥在林東

孤坐呈客

晨起猶孤坐鉗泉待煮茶寒煙添竹色疎雪亂梅花獨

喜忘時事誰知改歲華多君能過此人里似僊家

登信州靈山閣跨鶴臺

清遊吾有分渾似昔曾來野屋憑高住青山到水回欲
看靈岫遠須待曉雲開漸漸生愁思鄉心上古臺

書翁卷詩集後

五字極難精知君合有名磨礪雙鬢改收拾一編成泉
落秋岳潔花開野逕清漸多來學者體法似玄英

大龍湫

瀑水數千尺何曾貼石流還疑衆山折故使半空浮霧
雨初相亂波濤忽自由道場從建後龍去任人遊

梅坡

淺水低坡幾樹苔冷光搖動玉塵埃橫斜直似安排得
古怪多應折損來潔白要從侵夜看飄零却是被春催
閒行立斷清風影一片飛香落酒杯

秋日登玉峰

玉琢孤峰壓富沙人行峰頂步雲霞溪流緩去幾回曲

樹色幽分無數家，翠拂寒煙平似水。
紅飄霜葉遠如花，明朝重向城中望。
對北一松應不差。

題東山道院

古院嵌嵌石作層，綠苔芳草近郊垌。
溪流偶到門前合，山色偏來竹裏青。
靜與黃蜂通戶牖，閒將白鳥共沙汀。
道人亦有能琴者，一曲清徽最可聽。

訪湖友

城中日日望南湖，乞得閒來訪隱居。
漸有秋霖籬菊長，

纔無暑氣渚蓮疎壁間古畫多賢像案上塵編半佛書
未見主人逢稚子不通姓字獨踟躇

泊馬公嶺

維舟拂曉步平沙晚泊雲根第一家新取菜蔬沾野露
旋編籬落帶山花門前相對青峰小屋後流來白水斜
可愛山翁無一事藤塙西畔看蜂衙

酒

才傾一盞碧澄澄自是山妻手法成不遣水多防味薄

要令麴少得香清涼從荷葉風邊起煖向梅花月裏生
世味總無如此味深知此味即淵明

過九嶺

斷崖橫路水潺潺行到山根又上山眼看別峰雲霧起
不知身也在雲間

徐致中

孝宗乾淳間人與永嘉四靈
為唱和友其詩格亦甚相似

夏日湖上訪隱士

煩暑何能避孤舟訪隱人水鄉菱藕熟晴野稻苗新為
學師前輩談空悟宿身鏡湖三百頃不似此湖濱

又寄

庭深自無暑苔徑復縈紆賓客不長到兒童自可娛荷
花晴帶粉蒲葉晚凝珠與我城闌隔茲歡想不殊

山居

柳竹藏花塢茅茨接草池開門驚燕子汲水得魚兒地
僻春猶靜人閒日自遲山禽啼忽住飛走又相隨

夏日懷人

此詩併謝公巖作別本又屬徐璣

流水階除靜孤眠得自由月生林欲曉雨過夜如秋
遠憶荷花浦誰憐杜若洲良宵恐無夢有夢即俱遊

夏夜同靈暉有作奉寄翁趙二友

齋居惟少睡露坐得論文涼夜如清水明河似白雲
宿禽翻樹覺幽磬渡溪聞欲識他鄉思斯時共憶君

初夏遊謝公巖

又取紗衣換天時起細風清陰花落後長日鳥啼中
水

國乘舟樂巖扉有路通州民多到此猶自憶髯公

登橫碧軒繼趙昌甫作

步陟高高寺徐行不用扶青天晴又雨山色有還無句
向閒中覓茶因醉後呼所懷論未足何乃又征途

不食姑

惟誦天童呪飲泉能不饑只緣多自譽翻以致人疑賦
質全如鶴謀生却似龜綠華通籍後會報女僊知

宋元詩會卷四十三